

PN aprova ona OJE 2020 iha final global



Parlamentu Nasionál halo votasaun ba proposta OJE 2020. Imajen Tatoli/Egas Cristovão

DILI, 08 outubru 2020 (TATOLI) — Parlamentu Nasionál, ohin, aprova ona proposta despeza Orsamentu Jerál Estadu (OJE) 2020 ho montante biliaun \$1.497,1 iha final global ho rezultadu votasaun a-favór 43, kontra 21 no abstensaun 1.

“Ho nune’e proposta-lei orsamentu 2020 pasa iha final global iha Parlamentu Nasionál tanba aprova ona, ha’u husu ba komisaun C (Finansa pública) bele rezolve ona redasaun final orsida lokraik no aban ita bele haruka ba Prezidente Repúblika”, Prezidente Parlamentu Nasionál, Deputadu Aniceto Longuinhos Guterres Lopes, anúnsia liuhosi debate especialidade loron ikus, iha plenária, kinta ne’e.

Despeza ba tinan fiskál 2020 biliaun \$1.497,1, ne’ebé prevé ba saláriu no vensimentu millaun \$206,7, bens (sasán) no servisu millaun \$499,3, transferénsia pública millaun \$568,7, kapitál minór millaun \$8,9 no kapitál dezentovimentu millaun \$213,4.

Hosi montante orsamentu biliun \$1.496,1 gasta ona balun, hahú hosi janeiru to’o setembru liuhosi Dotsaun Temporária Orsamentál (DOT) no restu orsamentu ezekuta ba fulan outubru, novembru no dezembru 2020.

Total despeza ba Orsamentu Jerál Estadu 2020 biliaun \$1,497.1 (la inklui atividade ne’ebé finánsia hosi doador sira ho valór millaun \$184.0, liu 1.0% kompara ho orsamentu 2019 nian.

Timor-Leste iha rejime duodesimál (DOT) durante tinan 2020 nia laran, tanba orsamentu la aprova tuir kalendáriu regulár ne’ebé iha. Limite de’it ba 1/12 hosi orsamentu orijinal tinan kotuk maka bele fahe kada fulan. Ida-ne’e signifika, funsaun esensial Governu nian bele kontinua maibé polítika balun ne’ebé fora hosi atividade anual la bele implementa, inklui projetu infra-estrutura importante balun. Iha proposta OJE, alokasaun ba kapitál minór no kapitál dezentovimentu sei aumenta iha último mes hosi orsamentu la’ós DOT 2020, nomos inklui ona millaun \$220.2 ba Fundu Covid-19 atu responde servisu saúde no rekuperasaun ekonómika.

Montante orsamentu biliaun \$1.497,1 foti hosi fundu petrolíferu millaun \$963,9. Montante orsamentu ne’e Rendimentu Sustentável Estimadu (RSE) millaun \$544,4 no transferénsia superiór RSE millaun \$419,5.

Entretantu reseita naun-petrolífera millaun \$770.6 kompostu hosi reseita tributária millaun \$165,0, reseita própria millaun \$6,8, doasaun millaun \$10,7, jurus millaun \$0,5, saldo jerénsia millaun \$527,6 no empréstimu millaun \$60,0.

Hakarak fó lembra katak, iha loron 3 dezembru 2019 governu deside retira proposta OJE 2020 ho montante biliaun \$1.995 iha faze jeneralidade loron daruak, tanba la estruktura no inskonstitusional.

Nune’e Governu kumpri rekomendasaun PN nian hodi redúz ba biliaun \$1,668. Proposta ne’e governu apresenta hikas ba Parlamentu Nasionál iha 19 dezembru 2019.

Nune’e PN hahú debate iha loron 15,16 no 17 fevereiru 2020, maibé iha loron ikus faze especialidade orsamentu ne’e la pasa ho rezultadu votasaun a-favór 13, kontra 15 no abstensaun 25.